

Raidió Rí-Rá

Ceist 1 Beidh tú ag féachaint ar ball ar mhír nuachta faoi stáisiún raidió Gaeilge ar an idirlíon.

Féach ar an tuairisc uair amháin. Cé mhéad den eolas a d'éirigh leat a thuiscint, bunaithe ar na pictiúir agus ar eolas ar bith eile a bhí agat cheana féin?

Ceist 2 Seo stór focal a bhí le cloisteáil sa tuairisc. Ag obair leis an duine in aice leat ceanglaí na focail Bhéarla ar chlé leis na focail Ghaeilge ar dheis:

application:	a íoslódáil
license:	suíomh (idirlín)
multi-city:	ceadúnas
temporary:	obair dheonach
listeners:	dírithe ar
directed at:	sealadach
to download:	iarratas
site (web):	digiteach
voluntary work:	éisteoirí
digital:	ilchathrach

Ceist 3 Féach ar an tuairisc don dara huair. Freagair na ceistanna seo thíos:

1. Cé chomh fada is atá Raidió Rí-Rá ar an bhfód?
2. Cé mhéad éisteoir atá ag an stáisiún (ar líne)?
3. Cathain a bunaíodh an stáisiún agus cé air a bhfuil an stáisiún dírithe?
4. Cad is féidir leat a íoslódáil ón suíomh?
5. Tá an stáisiún ag cuardach ceadúnais, cén cineál ceadúnais atá i gceist?

Ceist 4 'ar an gcóras'

- (a) Cén chanúint atá agat féin?
(b) An gcuireann tú séimhiú nó urú ar an ainmfhocal tar éis réamhfhocal simplí agus an t-alt i do chanúint?
(c) Athraigh na focail idir lúbíní más gá:

- Chuaigh mé amach ag siúl inné agus shleamhnaigh mé ar an (bóthar) _____.
- Féach! Tá do chuid spéaclaí ar an (bord) _____ ansin.
- Caithfidh mé dul chuig an (cruinniú) _____ ar ball beag.
- Tá Seamus imithe leis an (cailín) _____ sin arís.
- Is leis an (fear) _____ an gluaisteán nua.
- Chas mé le Máire ag an (stáisiún) _____ traenach.

Ceist 5 Féach ar na focail seo a bhí sa mhír. An féidir leat focail a bhfuil malairt brí acu a aimsiú?

sealadach: _____
anuraidh: _____
iontach: _____
a íoslódáil: _____
deonach: _____

Ceist 6 Pléigh na ceistanna seo leis an duine in aice leat nó le do ghrúpa:

An éisteann tú leis an raidió? Cén cineál stáisiúin is fearr leat?
An bhfuil stáisiúin Ghaeilge nó cláir Ghaeilge ar an chaighdeán céanna le stáisiúin Bhéarla, dar leat?
An mbaineann tú úsáid as an idirlíon gach lá? Má bhaineann, cad a dhéanann tú ar an idirlíon?

Treoracha agus Freagraí

Ceist 1

Cuir an mhír ar siúl uair amháin le seans a thabhairt do na foghlaimeoirí an *gist* a fháil.

Ceist 2

application:	iarratas
license:	ceadúnas
multi-city:	ilchathrach
temporary:	sealadach
listeners:	éisteoirí
directed at:	díríte ar
to download:	a íoslódáil
site (web):	suíomh
voluntary work:	obair dheonach
digital:	digiteach

Ceist 3

1. Le bliain anuas.
2. 4 mhíle éisteoir.
3. Bunaíodh Raidió Rí-Rá le linn ‘*Seachtain na Gaeilge*’ anuraidh, agus tá an stáisiún dírithe ar dhaltaí scoile agus ar mhic léinn.
4. Iarchláir agus *PopNuacht*.
5. Ceadúnas ilchathrach sealadach

Ceist 4

(a) (b) – Ba cheart go mbeadh na foghlaimeoirí eolach go maith ar an chanúint atá acu féin.

(c)

- ar an mbóthar *nó* ar an bhóthar
- ar an mbord *nó* ar an bhord
- chuig an gcruinniú *nó* chuig an chruinniú
- leis an gcailín *nó* leis an chailín
- leis an bhfear *nó* leis an fhear
- ag an stáisiún

Ceist 5

sealadach:	buan
anuraidh:	an bhliain seo chugainn
iontach:	uafásach
a íoslódáil:	a uaslódáil
deonach:	éigeantach

Ceist 6

Is féidir gach beirt a chur ag déanamh an phlé seo agus ansin na ceisteanna a phlé leis an rang iomlán.

Eimear Ní Chonaola

Tá iarratas déanta ag stáisiún raidió Gaeilge, a chraolann ar an idirlíon, ar cheadúnas FM. Tá Raidió Rí-Rá ar an bhfód le bliain agus tá breis is ceithre mhíle éisteoir ar líne ag an stáisiún. Ceadúnas ilchathrach sealadach atá i gceist leis an iarratas le go mbeidh fáil ag éisteoirí FM ar an stáisiún le linn Sheachtain na Gaeilge. Seo í Irene Ní Nualláin.

Irene Ní Nualláin

Bunaíodh Raidió Rí-Rá le linn '*Seachtain na Gaeilge*'* anuraidh, agus tá an stáisiún dírithe ar dhaltáí scoile agus ar mhic léinn.

Miriam Maher, Craoltóir

Bímid ag craoladh 24 uair in aghaidh an lae, gach lá sa tseachtain. Chomh maith leis sin tá sé ar líne agus so tá muid ar fáil timpeall na tíre. Agus is féidir leo éisteacht isteach leis an gceol, leis an *PopNuacht*, leis na giotáí a dhéanaimid, so is áis iontach é go háirithe do dhaoine atá ag iarraidh an Ghaeilge a fhoghlaim nó *just* daoine atá** ag iarraidh éisteacht le Gaeilge ar an raidió.

Irene Ní Nualláin

Is iad na héisteoirí a roghnaíonn ceol an stáisiúin agus is féidir iarchláracha agus *PopNuacht* a íoslódáil ón suíomh. Obair dheonach atá ar bun ag lucht craolta*** an stáisiúin.

Síne Nic An Ailí

Tá muid le dul ar an gcóras digiteach amach anseo, an DAB. Ach, chomh maith leis sin tá muid tar éis iarratas a chur isteach ar cheadúnas ilchathrach a fháil go sealadach thar '*Seachtain na Gaeilge 2009*' ionas gur féidir le daoine a bheith ag éisteacht linn ar FM, ar an raidió ar feadh na tréimhse**** sin ar fad i mí an Mhárta.

Irene Ní Nualláin

Tá an t-iarratas á mheas ag Coimisiún Craolacháin na hÉireann faoi láthair. Irene Ní Nualláin, Nuacht TG4, BÁC.

* Tá an nós ann gan rialacha gramadaí na Gaeilge a chur i bhfeidhm nuair is ainm ruda atá i gceist.

** *a bhfuil* a deirtear

*** *lucht chraolta* a deirtear

**** *an tréimhse* a deirtear